



序

天地間以富貴世其家者何可勝數至於詩輒再
傳而絕如庾肩吾之有信徐摛之有陵為最盛矣
他若老杜長蘇詩中皆稱其子而文武過邁等無
一語可採兩公者其亦有譽兒癖乎不然何寡
也乃知天之愛風雅更甚於愛富貴有所秘惜而
不肯屢畀也我朝之初海內詩人蔚起而揚之
興化尤多名宿追其後亦漸趨平熟矣西齋王先
生起而大振之夢華山房一集雄深蒼渾上攀曹

劉而下提李杜非虛譽也竹樓者西齋先生之少
子也西齋謝世竹樓纔數歲不及聞過庭訓稍長
即知讀其詩而思紹其業朝研夕摩默契神悟既
入門戶遂躋堂皇竹樓有兄高掌西齋集中所稱
六歲誦毛詩者僑居余里與余最善偕試吳陵竹
樓見兄至欣喜如出望外時時追隨不倦迨將別
淚滲下至失聲不能語余以其天性之篤敬之
而竹樓亦余愛及與論詩文源流無不合遂訂交
必早至圖晤則詩文相質証指陳得失弗

忽然余之於詩時作時輟而竹樓心事銳
窮極先人之奧突而不留餘地比年奔走於鳳
城雒水之間應酬過多或失淺易去歲下帷授徒
自為刊定淺易者汰之雄深蒼渾依然一夢華山
房集矣冬月過余巷出相示命余為序余謝以凡
為弁言者大都顯名之士若余淺陋恐減君價竹
樓曰惟君知我不可無言夫知竹樓信無有如余
者記二十年前風氣驟變文尚富麗詩亦競為濃
艷竹樓曰與世異趣奈何余曰特禁可遺家法不

可失也君其勉之至於今向之濃艷已成腐臭過
者幾掩鼻之不暇而正聲漸出將來騷壇主持自
必首扶竹樓以為復古之程試且知為西齋先生
夫子一如當年徐庾之克世其家尤必歎為盛事
以誇於今也耀於後而余辭雖陋實為先事之論
當亦曰崇一知言者也又何回謝為哉同學弟吳
陵徐述夢題

余自揣無可刻之詩以友汪子璞非竊掇其殘稿
徑為付梓工未半而璞薨管子壘白非而繼之
徐子念哉復飲之集遂成先君集成於身後而
余乃及身見之良友之誼豈不可感然先君詩
步趨少陵名在海內而吳中揀選政者未蒙採錄
矧余小子萬不逮一者乎諸君子其謂我何我又
其如諸君子何也才乘牛日國棟自記於南梁官
署之留香書屋

雅

雅

雅

鵬飛

男雛

雛同校

竹樓詩鈔

興化王國棟著

五言古

白頭吟

白頭吟最悲寡鶴立洲渚不能遠奮飛千里渺前
浦一聲清唳響空天為激楚

白頭吟最悲鳳鳥刷新羽祇為雛求母非為鳳求

侶送故而迎新袖斑淚如雨

祖德篇

明珠不在山良玉不在澤精英各苞孕光氣那可
抑地圖不愛寶人必樹令德我祖海門來避倭隸
荒邑傾貲築金堤糴米活罄室雖蒙長者譽已減
寒庖食惟餘一卷書課子忘晨夕余高祖自海門遷興時修高堰
公慨然傾其貲身自董役家遂以貧邑
令凌公登瀛嘉之曰子長者其必有後
長材屈短馭四歷百里宰剛正忤上官淪謫竟每
每司餉赴檀淵血淚邊庭洒覆命歸羨金大吏顧
而駭往者魯不聞於今爾胡乃大呼司農堂天帝
實鑑在余曾祖司密雲餉分稽釐核得本折銀二
十四萬兩併羨金火耗三千兩歸朝廷前

後司餉官甚恐大司徒鑿不上聞公赴部以頭搶地大呼高皇帝在天實鑑良某尚書以下皆失色
稱曰鑄兵脩齊魯問衛良轉獲罪以山東參議兵
即中云妖賊未靖兵多肆殺無辜公檄府縣第殲渠魁散
諸脅從者歸田里給遺產數七萬人大吏殉將卒
意不合疏論罷拂衣歸滄溟清白留千載

大業歲名山清介緬王考少壯志凌雲喪亂懷其
寶神州陸沉後名場迹遂掃義重富貴輕愧彼致
身早孟津王公先曾王考尹孟津所得禮法先民
士屢致書接引公薄之卒不應
遺所敷在古道愛潔聞邾公耽吟說杜老看山有
軾轍杜門共幽討

幼夢華山去身浸華山雲名與華山高舉世仰雄
文形化其言在一卷留千春南遊適甌閩嶺嶠多
嶙峋直北拍燕薊軟紅長安塵悉收入詩囊歸卧
東海濱析薪克負荷弓冶啟後人嗟哉七歲孤頭
白長賤貧

小子失怙時摠角癡且嬌就塾晨抱書叔老持之
號不知酸楚音已向詩律標叔父哭兄詩有幼男
就塾仍朝起叔老長
蓋謂不肖也號手挽來之句幾年更衰頽飢走江湖遙故老一
以去碩果延風騷只今後輩人猶以及見豪城東

舊詩壇風雨時蕭

夏夜雜詩

旱天雨澤稀驕陽赫庚伏竟日葵扇勞入夜熱尤
酷所居非廣厦汗體垢新浴無母兩嬌女猶傍老
父宿氣蒸帷洪爐潛起伺睡熟空庭裸而坐摩脚
更鼓腹明星耿宵光片月挂南陸照此白頭翁腸
轉如車轂

仰瞻星月光曾照太古民太古不可見清光猶未
更俯仰邈太古五載菟為驚慈母去北堂故妻相

隨行湖邊獨樹村河漢夜自橫豈惟歡娛隔併無
呻吟聲營葬輦兩棺入郭成孤征眼前物態異珠
淚光瑩

人生百年內五十稱始衰我當四十時兩鬢已絲
絲少壯能幾日歲月爭奔馳胡為年尚賒毛髮為
促之落日下西崦弦月光半虧二曜逐暑寒來往
還相隨苦無駐顏術難老安可期

同懷昔五人今惟一兄在授書湖上村貧老生遙
嘅學俸給冬春其半由稱貸但得杯在手吟笑無

拘礙只今苦溽暑矮屋夜增倍東溪尋好風遠公

弄詩態南雲上人孤村良會少三笑佳話再應念白髮

翁離羣多硯礪

白蒲四哀詩

姜太史退耕

驂騑神駿姿千里恣騰蹕不受世羈紲追風向寥
廓忽遭孫陽顧天厩為籠絡高文千氣象采筆益
揮霍一宰花縣歸卧病何蕭索雄豪仍詩酒名譽
在京洛只有談天口僅全孫贖脚六集手鐫成身

後事寂寞

鄭明經西亭

寡鶴鳴九臯清越徹杳靄先公陟郎署
睿鑑釋罪悔羣季競通籍高尚寄江海北堂太宜人白髮
垂皚、魁然佞仇軀獨戲編爛絲墨花吐陶菊瘦
勁秋可採餘情愛新聲臧獲登場矮往、消人鬼
一笑千金買人去西亭留紅粉今焉在

吳明府李亭

古云生離悲豈謂死別好死者長已矣來往迹遂

掃吳生同年生出宰越中早吏治稱循良士氣作
文藻未及厚祿分遽傳歸櫬杳凍雪留我時天地
已素縞三年駒影馳生死竟顛倒金石有時虧人
命安可保况復擅榮名萬事任草、嗟哉白頭翁
何以怒如擣

吳明經穆堂

蒲塘彈丸地人文耀海甸延陵名公子搦管來酣
戰佳製在人口春風在其面苦心自勗勵大智泯
矜炫八法尤超羣婀娜轉剛健縱令率更生止爭

時代先煌。清華侶直堪衙官見而以明經終流
光虛掣電詎曰強而仕修文顏卜薦

乙亥除夕

飢年牲醴艱鼎烹亦宿治先人遺家法夙興行祭
事男兒列成行衣敝履新製心憐穉子嬉神愴童
孫逝情至拘忌泯無聲隨清淚我違恤其後絕續
闕先世晦日延末光鈞月南枝繫
小縣貧室多况復屢飢饉平時所親人稱貸忽生
釁歡容變詬詈除日謹尤忿吾家自節嗇脫粟拜

皇賑水潦或獻魚膳羞有餘餒市酤且滿壺高吟任

天運

嗟予垂髫孤未受趨庭教愁吟罕宗法草々不成
調間蒙所好阿恐貽大匠笑歲終一檢閱不堪自
迴照鈔謄顏尚厚剗計不到為我謝汪倫虛聲
未可盜

璞莊將為
余梓拙稿

少壯出里門老大方歸來卜築臨西河柴門近水
開僻巷雖云陋長者車頻迴自安薜蘿隱春風多
好懷誰知飢驅人挈室東海隈獻歲將發衰顧戀

舊莓苔仍換宜春帖
憔悴椒花杯

送癭瓢大兄

人生若轉蓬
踪跡隨風驅
倏聚倏復散
不顧情密
踈八閩黃山人
幾度來三吳
我獨訂交晚
邂逅東海隅
冥契非泛投
心一祇異軀
無如霜髮禿
種不勝梳行
當久別離脉
心煩紆

煩紆亦徒然
老不任漂泊
去家三千里
閩嶠行却
略隨身二十口
去住久束縛
自顧歲崢嶸
誰憐骨
戍削詩登韓杜堂
大雅今間作
僅以書畫名
先生

未肯諸去
勿復遺舉世多輕薄

輕薄者世人自有千秋業
績學自弱年圖史日陳
設買書擁百城披吟忘疲
茶只今政七十篝燈夜
不減俯仰歲幾更甘苦臂
三折丹青書卷助揮霍
天迸裂縹緲百尺樓一脉
誰能接

已知生離悲預防死別苦
君也五年長兄弟異爾
汝不用香火盟友恭流肺
腑義合如天親臨岐淚
如雨逝將攜家歸脫身重
遊楚詩篇托剗劇笑謝
東道主

璞莊許為刻詩斯言倘克踐
雙鶴家天舞

贈江四樵所

東臯多佳士江郎更秀發其温如良玉其潔如白日憶我訂交始閱歲已六七唱和吹壘荒契合投膠漆江湖各異縣動作經年別相見無俗情大率多樸質中身不得意蹭蹬常鬱鬱往者遊京華挾策詣北闕自謂天衢近所向無空濶杜用終閉陳軫口祇存張儀舌寧甘屢捐楮不肯偶干謁膝下無鳳毛掌上有鶴髮久抱奉情傷適歸空皮骨鬢膠續斷絛庶幾壯有室誰知星躔惡未幾遭磨蝎

參苓割膏腴棺衾竭心血昂藏七尺軀閨闈再摧折丈夫氣凌霄安能竟萎荏春暉無由報草心亦徒切敬為滄漚謀諸昆大歡悅小星在東嚙謔語焉敢說今秋隨賓鴻重九讌更設因作平原遊十日猶未歇謂我貧賤交如君肺腸熱豈可無一言使我心如揭當其酬酢時心緒紛轆轤滿懷欲傾瀉錯亂舌復結小石如坳堂百川灌欲竭翻因病醒暇宿諾聊短述臨池意自深愧乏君家筆

讀左偶吟

詩亡作春秋運數厄陽九諸侯既不臣大夫復何
有鄭僑晉絳儔列國多可取叛亂不勝書國柄竊
毒手豈必姓遽更能令府空守狡哉魯意如內奸
外掩醜三桓亦以微虎也掣其肘
斷帶誇三登抉門輕一擲乃生大聖人賢子亦侍
側誰知以力雄相高卒以德甲蒙大車輪執之等
櫓戟如虎非虛稱亦是壯容色艷舒戕君母宋萬
破犀草是之謂亂人深為狼贖惜
陳靈從夏姬齊莊通棠姜禮法既以虧宜隱而更

張戲相與賜冠宣淫同禍殃庚宗一宿行失檢未
披猖誰知留遺孽夢天兆災祥首投寧風棘丙壬
安可償咄哉魯男子寒夜凜大防

天子下堂日霸業光晉重悼公復繼起庶幾振唐
封六卿各自謀先業追無踪豈惟一國故此實閔
姬宗勾吳通上國入楚不世庸夫差大報越誰敢
櫻其鉢忠謀不得入莫但悲吳儂

同胡壽泉諸子暗香書屋銀茶分體

春風吹暗香已過林逋宅羣芳正待時銀茶標韻

格臭味無可尋皎々炫本色素聞東坡語瀹茗欲
其白恣其誕漫辭甚至嫌雪黑窓前小盎中似玉
三年刻而獨以茶名雖白不能喫東鄰天桃花緋
紅亦間碧對之成小巫品題難假借循名若可烹
重色安可摘主人愛茗戰素菟晨暮滌厥地名拼
茶茲花莫典客

白兔詩

金小塘有此詩今東臺署中亦畜之
率成二首各有寄托非以和金也

白兔何皜々皎潔自生憐鷹犬不能攫長傍几案
前時復肆跳梁穿穴其性然迷離與撲朔雄雌誰

辨旃既不育月窟又不登祭筵徒以供玩弄毋乃
違其天

曾聞策士謀狡兔有三窟謂人亦復然田文保舊
物我無狙詐才生計日以拙目昏遜視明齒豁類
唇缺東走復西顧與爾竟無別何不棄塵寰擣藥
入寒月

庚辰夏苦雨述感

四月至五月十日九陰雨或急挾雷霆或細密絲
縷水鳥飛上屋行蟻穴高樹近郭汙邪地嘉禾納

水府三時少日光驚心又小暑甌窶雖未沉圍堦
只寸許西堤已決防長驅闢門戶豈惟一歲憂終
將魚鱉伍庶幾緩須臾商羊又起舞

貧家逾十口素無可耕地豐凶閔生命豈止一家
計巨浸忽稽天沉淪無噍類彈丸亦王土當事
胡不議忍令百里民活向魚腹瘞 醒皇體痾鰥
一民不忍棄曾發 天倉粟百萬賑凋劫倘為痛
哭陳亦或悉利弊而以 絲綸重唯 一無異減
賦固 特恩戕生豈天意屏翳不須誅從古有興

廢

時春 旨高寶
諸閤常開不閉

哀老百骸壞瘡痂生四肢燥癢不可耐爬搔腕為
瘦沸湯快一探應期難刻遲致此罷癘狀竟同百
卉腓南方固卑濕又苦淫雨滋兩月沒曦輪青黴
點素衣乍熱幸夜裸乍涼愁晨披性匪衽中散疾
痰來相欺

久苦霾雲重暫見朝暎吐西堤猶未警東臯望秔
稌片雲忽卷舒晴日滿廊廡併無鬱蒸氣清涼淨
天宇數點忽斜飛又濕半乾土豈真圓蓋漏頽陽

莫能補不圖 明聖世至此多舛午人有醒而狂
天有晴而雨

為黃鞏堂題瘦瓢畫冊

我與瘦瓢翁末年結深契始會乙亥秋再會丙子
歲文園共居停晨暮不相離讀盡息躁心勘詩費
凝思耳重艱話言心曠好游戲別來復幾年見畫
生嘅喟想見拂素時吞酒如藥味君不善飲每作
畫必擯眉盡一
危以助其氣 鞏堂交更先藏此自寶貴索我題頓首未
審圖所謂提付葫蘆提但寫相思意

題瘦石照

文園東海濱詩名滿天下黃生實擅場詞源三峽
瀉而不受繩檢往 遭世罵得酒必為監乘權小
戶嚇犯科亦微愆苛政不能赦邇來苦沉酒積醒
困晨夜兀然坐石上糟床壓春醉

偉哉七尺軀詩酒稱豪雄豈無聞達具而以岩壑
終往者遊 帝京迴車經洛嵩歸袞富詩帙無改
去時窮如水盛年華顧影嘗撫躬寫此寄浩歎箬
笠顏豐融撫鬚時一吟穆爾餘清風

冬至前五日余六九賤辰諸公就文園醵飲
而瘦石作詩稱慶次和致謝

客中遲五日嚴冬將數九逢辰近七十形容真老
醜何人誇松栢弱質愧蒲柳骨傲老漸靡相愛徧
童叟所過多歡顏而况素心友東臯黃瘦石時違
久株守酒令無翼飛詩名不脛走時摩納川腹日
肆談天口作客依所親垂橐竟何有謀聲今日歡
酌我以大斗醵錢荷羣公醉後忘某、閨箴已摘
花拇戟更交手倒樽若崩泉不復辨肯否天涯驚

歲暮酒闌搔白首閱貢常累人如斯何用壽

自題乞食圖照

傲骨恥干人飢腸乃乞食叩門十九閉損惠萬一
得少小覷面顏慙慙到頭白為術亦以踈種、不
堪憶誤入親戚門冷落變容色出鄉為流民不敢
計豐嗇或乞以冬烘句讀去聲疲晨夕或乞以筆翰
娖媚蒙指摘或乞以韻語家學愧狼藉或乞以制
義科名遭刻劾所有惟硯田終歲不稼穡兒孫馬
牛我度越阡與陌天寒風雪多裘敝神氣索幸無

蹴爾聲披圖笑啞

示三姪惟

君子五世澤以數則過矣我兄中道徂遺子殘經
史餬口三家村學俸供食指一旦值飢年常缺薪
與米所幸品未虧不過貧而已貧乃士之常可温
亦可喜年華逾半百斲無易操理汝叔今七十髻
鬣嗟頽尾所恃一卷書艱難汝親視憔悴到白頭
微名何足恃賣文走四方終歲越鄉里跋涉作馬
牛多子徒為爾分潤無斗升對汝滋愧恥吾人在

自立骨肉安可倚

同李砥齋黃鞏堂瘦石汪璞莊登北固二首

飽飯下江樓繞城向北固迤邐龍埂長直上入甘
露坐定氣稍平却顧來時路度地僅容足肩輿不
敢御下視臨無底歛足戒旁顧予于過此險已深
轉行懼

四望甕城山環集若奔赴有名不能辨晴嵐一烟
霧大江隨我來掉頭即相晤肘腋伏金焦海門濶
難渡略尋孫劉跡細詢宋梁故山僧指鶴林命駕

更南去

米墓

南宮襄陽人墨妙超前古為愛江南山爰定江南

宇蘇黃相頡頏於斯結儔侶共有千秋名獨留一

杯土

十三松

松骨倚天枯百尺蟠虬龍霜雪飽千年靈氣山所

鍾鶴林何時物所貴在遺踪只今剩六株猶說十

三松

清明山行

令節何所之言尋獸窟去聞與招隱近入山走

去聲

西路山村不禁火林端午烟度羣山皆負土稜

石骨露或峻鋸如刀或橫利如鋸或下如奔牛或

止如伏兔又如初平羊未叱尚蹲踞有輿之所過

駭異目屢寓中途峴山閣小憩更迴顧旁有展墓

人憐我髮垂素曳杖亦偶然登高豈窘步

由小九華至獅子窟

纔出九華山取道不能已遙望層峰顛失墜在尺

咫尺徑輿復敲身側虛無倚此身寄天地夸險適
然耳委命於僕夫日瞑不敢視

由獅子窟至竹林寺

山勢大起落摠之非坦途習坎有重險登山寧獨
無幸離獸窟厄回首愁輿夫下視金碧林松竹青
糝糊夕陽下夾山慚愧捋霜鬚

早行

四更雞未鳴啟明已將上跨驢逐隊行揚鞭奮前
往我年政七十曉行自今昉傍山不見山但聞流

泉響

千佛嶺

我、紫峰閣峰高接佛嶺峻削不可攀迂道陟其
頂千佛點蒼崖鑿破峰巒整誰為剗斲之山靈應
首肯

雲根泉

雲根流清泉晝夜不停息隱顯無定所於斯見山
脉忽然成巨浸容納鑿石壁僧曰天顏霽錫名
曰功德

幽居

奇峰不挿天橫出勢鬱勃排列怒向人銳末似芥
鉞其根潛地底微露皆秀發安得吸江水洗盡攝
山骨

顧茨山攜酒同姜南園吳樵月小集古藤書
屋

東園抱溪流春風滿林麓時有款乃聲鳥聲相與
續老客寄行李絲來媚幽獨中有古藤枝蜿蜒走
書屋讀書韻有餘杜門樂亦足酒甕落提携三人

來不速

有酒細斟酌高論何煌煌科名付倘來不朽惟文

章前輩一以去邱墳多荒涼謂退耕香何人紹風

雅再登作者堂我髮已盡白公等亦蒼々修名不

早立能母老大傷時有彙鐫七
子詩之訂

午日陳敷士吳景山舒堂樵月顧致堂恐羞

此山茨山攜榼就寓園讌集

我來三月中轉眼到重五舊雨劇多情盛饌已數
舉謂此宜醉辰携榼集儔侶魚鱉膾鮮鱗雜陳若

相賭憶昔締交初廿年積風雨當時莫逆人其半
為黃土存者半遊宦萬里信音阻我老幾日健我
客幾時聚甚感諸君厚綢繆似吹煦脉々入醉鄉
中情向誰吐

薛蓉鏡許送桂栽索句

我家一畝宮隙地多種樹蒨藹蔭西墻春夏繁花
吐潘園收石榴蜀國出西府色好香則無秋來惱
風雨淮南載小山叢桂香可茹僻縣非土宜間有
眾爭聚折其徑寸枝輒遭主人怒江村密成林彌

望不可數大者如老翁小者類短豎前庭映後檐
葱鬱成桂圃詢其繁滋故卑枝壓使僕越歲根橫
生移栽自謂歲壓無一失豈止十得五所以荒
園內叢茂無曠土我聞頗心動道遠焉得取先生
曰無虞移根勿令苦兼大其土礎茲事吾當許贈
樹吾不慳索詩汝寧拒居然取噬嗑韻事作諧語
廢居盡如斯吾將傲良賈

徐蘧堂孝廉六十

尚憶訂交始猶是少壯歲可怪雙丸疾倏忽老已

至我昨過古稀曰者君亦屆佳兒為製錦盡職不
為肆先生曰不可豈不諒爾志吾親猶在殯哀樂
不相類遽見萊子舞恐揚杜蕢解予兒以令名陷
我於不義兩說若並衡誰敢妄軒輊
稱觴事可已為孝亦多術拜舞一夕歡著述千秋
筆先生詩與文直入古人室豈惜梨棗功因循久
不出授權於後人不如手訂實用為度世針莫作
藏山帙文章乃壽世急用付剗刳事無大於此當
世望已缺儲酒待明年候慶到耄耄
尊闡明年亦六十

狼山道中作

同吳韋絃生
使得九人

昨聞登山約遊具夙已集扶老借枕柳蔽日借簷
笠晨興不暇卧短衣矜便捷遊人屈指九山路計
里十連車軋、鳴遠樹村、接所見農事勤昇平
驗海邑忽覩路旁塚引望殊爰業云是舊京觀倭
奴埋戢叠憶當勝國哀此輩勢常翕崇川乃門戶
每苦長驅入官軍力不支鼠竄開門揖鄉民曹將
軍名鼎義激奮鎧甲一麾三千虜授首死盡溘遂
建不世勲廟食俎豆給我朝 皇網振海氛靜震

讐百年無外警三農各蒙業月令夏至交得雨新
秧濕緬昔殘破時那復見餉饁我車亦安驅幸免
飛塵襲

旅夜

老客夜寐寥觀書眼如眯小僕進卮酒非其所甚
嗜既進寧却之三杯兀然醉古云醉忘憂我醉憂
麋至百事攢一心撫鬚雪霜墜雪霜能有幾不如
解衣睡

夜睡若不寐歷三數更籌輟轉床第間寒夜如年
修胸中煎百慮枕上炯雙眸雙眸有時倦夢短不
再求百年自有涯矧我已白頭此非長生訣作客
徒淹留

六月下浣同章希齋何藥上僧象先傲蜃樓
觀晚霞結撰之奇章子繪圖作詩題之

六月風日佳薄暮攝炎暑晚飯帶微醺緇素挈儔
侶傑閣聳西北倚窓瞰平楚光采忽紛來靈氣動
海宇雲霞天上物變幻繪下土淡抹作川流濃堆
類村樹我欲宅其中繁陰護門戶不必蜃中樓何

用桃源塲造物露端倪一瞬不再覩作詩懼荒唐
為圖可誇詡此事屬章公拓筆任翾縷

自題章希齋所畫竹樓圖照

我無經世才亦少治生術在家恒苦飢出門棄蓬
葦非無好居停淹留亦暫逸分困猶間有割宅竟
未必章君善傳神與我交更密繪竹為小樓兀坐
見白髮蟋蟀竦秋吟桐葉亦蕭瑟可以指我名可
以指我室展看自得意何必居近日衣食苟終足
於此終容膝

題亡友徐蘧堂遺照

何年為此圖我昔未曾見題咏不一人立言盡婉
善人比梅花清圖中融一片顧茲畫裏容不似生
時面披圖為悽神哀吟淚如霰

我與先生交歲月亦以久我壯君弱冠無端兩白
首昨病我未知存問悔已後萋斐迎故人悲歌心
欲嘔語雜不成章至慟難脫口

暗香書屋中四壁皆輓章我獨無一言豈曰竟遺
忘達人了生死萬蕪增悲愴問所哭何人而但感

北邙不如絕命詞自輓音琅
我長君十年君逝我當繼天故留老僮為校詩文
字校字豈無人令嗣承先志開雕已命工千秋身
後事為報圖中人我亦當破涕

送春日咏文園繡球紫藤得九字

文園花事繁觴咏誰甘後亦有同時開位置分左
右不與衆芳齊至尊讓鹿韭南榮攢碧玉幾樹生
部塿其上燦朝霞朱英滿架走連朝近天香闕此
酌杯酒同是春園花將毋議偏厚昨宵雷雨急羣

芳厄陽九園丁謹遮護曾不遭踐蹂好春將去我
留花娛白首俯仰兩俱妍豈曰匪其醜

與江八葯船

憶昔與訂交君年甫弱冠日月如奔流瞬眼歲增
半計此二十年每感晨星散一見一回新經腹光
燦爛花筆夢中生江虹月夜貫相望附青雲彈指
凌碧漢而乃久雌伏明時徒搯腕讀君自壽詩牢
騷滋永歎績學得餘閒豐嗇有定算千秋克自立
三公不以換於此悟天心何須占易錄老夫馬齒

長泥涂辱已慣彼蒼也放閒獨受窮愁絆名實兩
俱弛徒然積憂患磨蝎紀星躔鈞陳轉支幹相期
延壽命窮達毋惑亂

竹樓詩鈔

七言古

太守來

興化王國棟著

太守來謹如雷鴻嗷、其鳴哀太守不顧赫然震
怒榜示爾民慎無誤械飢民縱復囚鳩鵠聞之吞
聲休寒流活、風颭、

禱雨行

亢陽炎、燥大暑汗邪上農力作苦田枯如石汗

如雨一夜桔槔終濕土縣官檄下羽人舞應供故
事次第舉飛來雨絲細如縷明朝市上開屠沽

題如臯丁明府一峰先生丁卯戊辰禱雨書
事後贈法官吳蘭坡

古來非常可喜事必藉大書流其芳神仙方技涉
幻怪亦或靈異非荒唐文成五利肆欺罔長房法
善堪褒揚流傳千載真妄判祈禱孰可通穹蒼五
十年前夏陰伏肥蠶蜿蜒來吾鄉廣延法侶到臯
邑字曰赤城其姓章祈雨得雨大歡洽密啟邑宰

無憂惶狂魃既誅支祁逸陽侯肆毒恐莫當丙丁
戊巳皆巨浸沉災疊至其言償迄今里老尚傳述
章公寧妄言災祥後來繼起者誰子蘭坡咤叱排
天閻蘭坡昨自京師返大光明殿升其堂真人妙
止授真訣但未明試功不彰別來兩載鱗鴻隔側
聞禱雨喜欲狂始信傳授有源本世上凡骨誰敢
望又疑傳聞或詞異星劍屢試能無戕今冬道院
留行笈蘭坡道貌尤軒昂示我丁公大著作敲金
戛玉聲琅琅指陳情事鬚眉動摹繪靈應神鬼藏

其人其文皆可信蘭坡聲價高難量章公子孫珍
滅盡君為後勁尤擅場傳與吾鄉作佳話早年何
苦焚巫尪

龍燈行

湖田屢浸波濤洪天心悔禍拯民窮幸一降康僅
半獲歲終十室困九空我民賦重知急公不謂民
淳謂歲豐榜示元宵大令節懸燈須遍六街紅六
街燈棚猶未結昏隸已舞然燈龍金鼓喧闐塞街
巷沿門索燭怒相向主人忍諾不敢嗔有恃而來

誰謂讓夜然燈火還復來晝則索燭夜酒杯晝夜
咆哮汗如雨穀日纔過到三五龍兮龍兮爾何誅
舞龍之人猛於虎

為張明府杏莊先生題課子圖

君不見東魯世婦老敬姜逸勞示訓何煌煌又不
見杜家泰姬育七子韋絃之佩凜愆忘嚴師嚴父
教寧惰閨中尤賴姆教以古傳其事正經傳畫師
作繪非荒唐佳兒已具食牛氣神寒骨重頭昂巖
端方固已預胎訓即勞成愛虞嬉荒手書檢課正

句讀背誦如聽聲琅々長篇難字語微澀注目凝
思心徬徨阿母提撕方諦視阿姊旁睨清盧光三
人神采見阿堵妙筆傳出窮微芒一片桐陰覆書
案寂寥天地生清涼斯人斯圖妙粉繪古事正為
今呈祥借問作圖者誰子錢江石舟其姓康

題五松

吾友復堂畫五松作歌慘澹經營中筆端已自力
排鼻向裏亦復神蟠龍復堂長往會者少筠谿左
子來追踪穿插譎詭出新意舊本新製羞雷同展

開素紙十餘尺躊躇四顧心力雄蒼如老人骨偃
僂翠如仙子容豐融或俯而下如攫物或仰而上
如騰空不衫不履脫凡俗粗頭亂服開鴻蒙此物
之生含元氣兀傲肯受秦皇封稱為五大夫不若
五老翁千年琥珀匪難得與天同壽無終窮不是
大手筆徒嗤墨豬濃孰能寫出倚天骨張之謾々
生清風左生畫畢向我笑復堂之句應推公

相逢下馬行

客南梁杏莊明府白工回行至
巷口不能引避下馬數語而別

蹒跚曲巷春風窳官路馬蹄行得々揚鞭蹀躞如

趨風掉頭一盼迴金勒下馬且復立斯須相憐都
是風塵色但問飄零胡不歸斜陽一片兩手戟

古樹行

同黃默菴瘦石及主人仲柳園荔亭父子

誰家植此支離翁輪囷拳曲撐鴻濛抱霜飽雪歲
幾改苔痕剝落鏘青銅枝繁葉密猶結子不敢呼
作木居士幾經霹靂燒槎朽露根碍足拏龍蛇豈
無匠石過而顧材大難用徒咨嗟只今新綠蔭廊
廡浥露含風自吞吐海邊神物謹護持直欲東傲
扶桑古

次和黃默菴使君枉贈

詩家品格分枝條何妨瘦島兼寒郊不求真意尚
繁縟譬猶腥穢恣饕餮食古未化事懶祭檢閱砌
湊無乃勞縱能採摘富詩料苦窳亦恐非良陶江
夏黃公偶病脚幸得良醫今勿藥華宗

瘦石邀集兄弟

古春園載得新詩滿囊橐風流自賞多豪情真金
不畏衆口鏢本無煩穢汙筆端幾回欲出還斟酌
人生聚散如浮雲西場攝篆舊政新詩壇隔日却
重建文章交誼皆有神又向西家賦古樹各分旗

鼓張去聲吾軍如細柳不可動棘門霸上徒紛紛

吾聞相視莫逆乃吾友醉心豈必須杯酒誰為今

日出羣雄且箱稷下談天口明公靜穆如清風老

夫甘作牛馬走百年易盡年尚賒歲寒松竹終相

守不然但誇絢爛三春花只恐頃刻幻化為蟲沙

辛巳七月紀事頌撫軍桂林陳公

九載昏墊警唐堯伯禹幹蠱隨刊勞歷數千年沐

明德支初逸出陽侯驕司空受命傾內帑築

堤直跨金城高射洪以南建諸閘隨時啟閉誰敢

撓下入東海三百里吾邑中道承洪濤嘉禾魚上

鏹未刈老屋蛙聚風還搖壯者流亡老溝壑富者

節嗇負啼號自癸及辛亦九載朝廷捐賑胥吏

豪撫軍陳公大悲憫奏請閉閘加堅牢丙子歲南巡奉

旨諸閘長開不閉昨歲踰閘水東注親泣荒邑連昏朝廷

引紳耆共籌畫欲奠茲邑心煎熬地凹路逼究何

策誓曰吾在寧爾曹遂開通江大門戶上流旁洩

治其標天子曰咨底可績金錢百萬輕如毛謝

埭南頭六閘下袞袞百里紛鉏鋤今年伏汛恐猖

六
猴離署旌節臨堤坳步行堤上自巡邏低者加築
高如橋水勢日增怕崩決河工官吏喧呶公以
身殉各掩口東風十日回天滔僉曰精誠格上帝
汙邪亦慶籌車饒忽爾東南轉西北狂瀾怒湧如
海潮堤崩閘啟勢難已一鼓東下田廬漂宣房瓠
子不日塞猶保一半安衡茅自是天心不悔禍公
任厥咎無所逃上聞恐遭大譴責誰知天語
翻嘉褒更發帑金專任使河臣不得紛喧囂我公
願力繼神禹堯仁宣播齊明昭

送李蓮坡歸關中

九秋霜遲木未落西風捲地冷樹脚吹動天涯遠
客心驟網欲發踰宛洛四座停杯悄無言別離雖
暫心不樂客曰諸公意固殷客心委曲尤應度憶
昔違家曰壯時親年未艾婦綽約其時大母猶在
堂佇望歸鞍報乾鵲祇今十載羈揚州大母終天
身繫縛詢知親顏亦漸凋少婦初歸意寥廓君續配未
逾年而田園門戶塵遠心徒致郵筒虞缺略人生
能得幾十年轉眼霜華鬢蕭索今年歸去明年來

渭樹江雲行躡，我聞斯言神忽悽。客程長短同
化離君自秦中至海上，三千餘里行逶遲。我近家
園數百里如蟻走，磨無停蹄屈指經行自吁怪。一
歲可敵君往來，叶往來為家計席不暇暖。哀
年悲今年海濱得賢主意，謂安坐休孱羸。詎料兒
孫束朽腹取盈不足，思補虧觸熱浪遊到秋杪。奔
走空剩骨與皮，我貧我老固應爾。君方得意胡不
歸，但願明年惠然至。丈夫孤矢四方志。

追題年伯姜退耕太史鉏經圖應文孫治臣

請

江天四月風雨多，立夏以後纔清和。昔年景物盡
變滅，尋常不忍經。西河西河之上有遺老，我托通
家恨不早十年奉教几杖從。十年墓上多宿草，憶
昔命題荷鉏圖。昂藏老鶴神清癯，今見鉏經轉妍
好。雪霜猶未侵髭鬚，初到長安奮皇路。一時名
宿爭延譽，千里名駒產渥洼。陌頭蹀躞孫陽顧，清
才絕世動王侯。聲價百倍傳九州，古來材大難為
用。杜依然伏櫪埋荒邱，著書種樹兼卧病。始信鉏

經心並競家藏百笺翹米春吟餘日、中賢聖風
雅誰登作者堂別裁偽體音琅、力追杜韓尤屈
強聲牙不許俗口張科名著述傳衣鉢直付封胡
與過未中間頗有象賢人早向泉臺化異物門前
冷落鳥雀喧風雨何人拜墓田令姪蒼麓回頭欲
問十年事圖書零亂隨荒烟盛衰倏忽眼前異看
畫潛、墮老淚文孫慎守出索題話到西河各顛
顛

藤樹倒

高樹扶藤而死年
久樹朽藤與俱斃

朱藤植根近高樹、幹槎枒藤久附藤柔樹勁兩
交柯融成一片碧烟霧樹剛終不勝藤柔榦存枝
秃常幽囚百年喬木竟枯朽千條萬縷藤枝稠我
見枯根幾太息謂藤不仁恣吞食觀者爭愛物態
新柔枝叅天擅竒特壬午交秋風雨多繁藤抱樹
如網羅雨重風狂朽枝斷吁嗟相抱同跌蹉人生
有骨自立好倚人作勢終莫保藤兮藤兮今始知
當天日赤冰山倒

文園七夕分體

海氣蕭、攝殘暑穿針樓上驚風雨玉葉金支天
女孫停機夜半迎河鼓天上佳期不可逾一年一
度傳千古此自星文動天象人間煽誘癡兒女架
言乾鵲例作橋顛毛禿盡絳河渚手陳瓜果口祝
詞仰看巧雲夜正午達哉遊戲送窮文至今獨有
昌黎愈老夫白髮垂鬢、便見雙星首亦俯况復
霾雲雨更繁震擬黃姑步踽踽我來訪友正及時
不辭風雨吾與汝

再題筠谿畫五松兼贈吳八漁友

左生疇昔畫五松藍本復堂稿不同我為作歌贊
其好欲和復堂追前踪只今詩畫在人壁久不寓
目知誰工我詩汗漫不更作左畫有求詎能却適
展吳生便面來五松忽向風前落意欲重書舊作
詩口不明言心暗托前詩不識為誰何吳生交情
殊不薄幾回滌硯手躊躇抄謄舊句慚淺膚近來
踪跡頗寥濶心情未改相見初安得人如五松聚
經霜飽雪同扶蘇顧此圖中枝屈彊或離或合或
偃仰倚天骨榦冬不枯柯葉青蒼作濤響天老其

材將用之漫將霜雪來侵欺大厦將傾要梁棟
匠石一顧斯呈奇憑君攜向黃山去穿石拏雲日
遭遇始信左生畫有靈寧忘野老狂詩句

目撐行

為崇川介道人作也道人姓丁氏名有昱
字麗中博學嗜古詩畫精詣藝苑尊之十
年前兩目忽闔不能開愛女適孫氏者為
製一物牽制以啓其明道人名之曰目撐
自為目撐狀而屬余為之辭

古來賢哲苦喪明前有左邛後張籍亦聞樂工目
盡盲奏公都是矇矓職要皆水竭睛無光五官不
備殊堪惜若乃青白全未虧脾濕眶肥睜不得坐
使書畫大好手終日昏暝畫常夕偶然用力一線
開作書半紙半在席消磨歲月藉殘編際此茫茫
竟如失愛女憐翁日坐愁靈心獨運思長策矯揉
撐拄人勝天務使鴻濛頓開闢先生錫名曰目撐
世無此物創此式以鐵為骨絨為衣關鍵耳鼻相
控勒製如清照虛其中曲折分寸皆得力上撐下

壓中自開復見天日無所匿造物不得操其權古
典亦未留其則世人肉眼大如箕蚩不能披妍不
識有眼直與無眼同女如班蔡終何益

書常蒼谷先生灌園圖

先生開平王十二世孫嘉靖十一年詔封
四王後封王八世孫元振為懷遠侯傳至
曾孫延齡忠誠守職國亡身自灌園號蒼

谷

有明開基起都梁從龍無若開平常義旗南指向

米石奮勇一躍趨敵 乾坤血戰中原定今符帶
礪河山長其間廢絕晚猶繼茅土重錫功彌彰世
家統緒傳十二武略終以文德昌立朝諤、不忍
默疏十二上多慨慷運移漢祚勢難復申酉之際
徒搶攘覆舟中流報先帝鬼神呵護相扶將儼居
江村奉慈母鹿門名共龐公揚中山之後結伉儷
金支玉葉形同戕東陵種瓜繼前軌漢陰抱瓮餘
幽光青、菜葉荒原野露濕常和清淚洒故國江
山尺土無先人功業丹書寫忠誠直接荷戈人祖

孫終始明宗社
題不波居士小影
不波居士筠谿子
縱橫藝苑程才技
英華不露人罕知
賞心最早觀之李
生績學自深沉
相觀相長成佳士
少日隨師入帝京
遨遊東觀兼西清
詩書醞釀少塵壻
一時聲動名公卿
歸來豪氣抑然下
貌若鶩無能者能
詩能畫能填詞金石
摩挲鐵筆寫家貧
親老生計踈年負米
行原野邇來賀得賢
主人十年浹洽禮益
新考今証古有精識

不似尋常偽冒真
君居停主我膠漆一
歲淹留月六七與君
氣誼無參差桑梓不
踈客逾密雨中示我
白描圖穆然桐竹相
扶蘇世上風波平地
起筠谿今存踞槁梧

六月十七夜同藥上筠谿希齋喬梓傲蜃樓
待月同賦

文園風景擅東海
四時攬勝心目改
最是炎、庚伏時荷
香桐蔭增光承幸
值晴明夜月圓一
片冰心玉壺在今年
六月多霾陰袷衣
不敵涼氣侵雨

昏烏兔盡逃匿望日忽霽烘如燧火雲飛時烈日
出氣鬱不舒盼日夕、陽風轉月正明十五登樓
到十七十七之月東升遲暑氣夜減風颺、江南
有客倚微醉露臺待月羣追隨我聞笑語披衣上
嬋娟窈窕光滉潑一線微虧自明朗不露全身射
林莽零金屑玉洒衣裳樓上高寒神惚恍循欄風
急難久留打人桐葉大於掌

寓言四章

羅浮夢神仿佛一瓣梅花結成室有香有色兼有

情千秋萬歲今宵匹為問師雄何代人想應未嫁
林逋日

湓江女偷芳春不教疑鬼更疑神留得好詩風骨
冷分明踪跡得非真豈知物色無人住水仙花是
昨宵人

秦樓玉善吹簫、聲似鳳、可招嫁得郎君是簫
史一齊跨鳳干雲霄只今樓上誰家女空有簫聲
鳳寡寡

巫山高巫峽遙瀟湘雲夢連春宵高唐忽感君王

夢、回一枕精魂搖朝雲暮雨非凡骨何似宮中
餓細腰

題李復堂畫菊

復堂寫生妙天下寸牋尺幅真無價生前無賴橫
索錢死後流傳任狼藉少年獻畫動天顏中年
作宦筆墨慳晚居林下名心淡交游多在菊花間
愛菊畫菊通一氣寫出枝、皆得意五柳先生不
復生臨池日采菊英醉十年泉下醉不醒文園見
畫間菊馨安得今宵呼汝起看我題詩手不停

題璞莊梅花圖小照

林逋老向空山住梅花豈止三十樹春來爛熳橫
復斜道是山妻共昏曙吟詩煮酒誰唱隨待臘衝
寒為內助世間尤物珍朱顏老梅粗醜偏幽閒肝
腸冰雪添斌媚暗香竟體浮烟鬢文園主人今和
靖園中梅樹稱最盛穿岩挿壁臨清池花時宛與
孤山並地多斤鹵颶風摧芳蕙憔悴粧難靚桃花
李花蒸晚霞主人偏為梅洛嗟幾株零落弄新綠
無復霜中能作花梅子熟時章子至

謂希貌人貌

樹皆絕技主人旁觀興勃然索圖小影憑梅翳羅
浮鄧尉美盡收三株五株不稱意殘毫禿穎寫冰
毫多畫寧干造物忌盤根錯節致離竒過水穿雲
無不備草堂以外雜卉無短筇大笠心如醉前途
未到花不窮安知不是文園地

題六老圖

雙丸電轉天門虛東升顧兔西跋烏百年易過白
駒隙長生妙藥渺蓬壺且復及時為歡娛出愁入
愁胡為乎山林鍾鼎會有遠相視莫逆吾為徒况

乃鬢髮總變白曰耆曰老多居諸文酒日高會跼

躋非良模形骸任脫略圖畫寧模糊就中依歸自

童稚吾師吾師顧與吳默齋東陽茗柯風雅飄長

鬚方岳趙君頽然風格殊黃中古心古貌老而腴

古者二阮今二徐清淮或手一卷互商確或屈一

膝獨紆餘或俯石牀或叅倚神采奕々間軒渠香

山不可即竹溪亦以徂吾鄉前輩多好事三益亦

寫遺民圖揚州酒人圖未見我父作歌夫豈誣茲

圖繼作與輝映流傳後世將爭驅猶及諸公少壯

日聲華藉甚高里閭朱顏不肯留斯須蛇螫護屈
老榛蕪委心任運同志趨畫師添頰徒區：那能
寫出心悅愉不然眼前豈少龐眉皓首者圖中之
人睨視知誰歟

竹樓詩鈔

五言律

十六夜對月

雲散寒仍重清輝別有天雪留今夜白月補昨宵
圓萬里秋爭潔一村燈復然表安莫僵卧春在酒
樽邊

水上對月

風色蕭、暮湖烟蕩、流水雲孤月動天地一身

浮白髮短堪數青袍敝孰謀自從荆婦歿絡緯不
鳴秋

己巳上五日同任五肇雍過羅二湘琳留飲

梅下

春酒酌春梅花香落酒杯深憐花信早豈待酒頻
催綠萼踈還密華年去不來歌斜扶醉影應得好
懷開

水後過浮沔館

三徑荒如此洪波太不情竹殘無客看柳卧礙人

行酒賦閒諸老樓臺抱少城池中鷗與鷺可待泛
春聲

喜晴同璞莊

積雨今纔歇雲陰尚恐人乍開殘照暖始覺小園

春客至情彌洽盧飛泉來杯寬酒更醇明朝須早起好

看綠新勻

立夏前一日送兒雛歸里

好送兒歸去哀翁默損神可知王粲客無奈阮家
貧水閣看移棹河橋並餞春多情慚地主歡讌帶

酸辛

將歸

亭午倏昏黑蒼，無霽顏風搖千樹而雲壓一窻
山澤國憂難解天涯夢已還西河栖隱地可得好
追攀

令兒生日

令子非愚魯其如失學何四書猶未熟十歲竟虛
過我此懸孤日神傷陟岵歌飛騰萬里路莫象老
蹉跎

登北郭樓

扶挈板危磴秋風北郭樓有天皆際水無地可維
舟高鳥孤飛迥遙村幾點浮最憐南嚮鴈屢失稻
梁謀

九秋吟

秋水

蒹葭渺無際搖落也驚秋野水兼天淨寒光帶月
流深無四五尺橫出兩三洲即此伊人在何須上
下求

秋吟閣詩

秋樹

西風吹落木，颯颯響空山。
誰信讀書處，秋聲在此間。
林疎栖鳥露，果盡衆狙閒。
為我問松柏，何方可駐顏。

秋原

寥濶乃如此，蒼然縱遠眸。
斜陽上哀柳，瘦馬立荒邱。
草木幾時變，閻山萬里秋。
西征有烽火，誰去覓封侯。

秋墳

纍纍盡荒塚，處處帶斜陽。
何日歸黃土，西風號白楊。
燐昏新鬼怨，草宿故人傷。
只有遼東鶴，千年弔北邙。

秋雲

一片出寒岫，隨風難自禁。
淡能滋白露，薄不掩疎林。
舒卷飛鴻亂，烟霜蒼狗侵。
雲中君可見，絕跡過遙岑。

秋窓

桐葉漸零落，南窓減半陰。
白能開老眼，明可見秋

心移几烏皮淨燒芸斜日沉多情憐顧兔夜影更
侵尋

秋蘭

恐負懷芳意悠然直到秋不妨清露重自有妙香
留短葉寒逾勁春心晚更幽靈均如可作紉珮到

江頭

秋瀑

壁峭挂飛瀑清寒已似冰况兼霜氣下只益雪光
凝映日纔懸布橫雲忽斷縉濺衆流涸晝夜竭

何曾

秋蓮

不盡榮枯感池塘露未晞尚餘殘粉在半趁晚風
飛雪藕人何往采蓮船已歸沙禽自来去寂寞帶
斜暉

李定齋以新刻寄示詩以答之

不見李生久

杜句

詩來感我心汗青非孟浪哀白肯

銷沉前輩風流在專家醞釀深獨慚餘敝屨未敢
說苔岑

先子富詩集艱難死後成千秋餘大業一代竟遺
名吳儂選本輕薄若曹體沉雄正始聲看君付梨
棗且莫急時榮

而我同庚者心憐趙倚樓西河有餘慟東海結深

愁羸博何年事烟霜九月舟雕鐫雖小集或可得

千秋得秋山表子去秋逢辰泛舟避客

西望孟城路將詩代札傳家貧繁食指力憊聳吟
肩足了一生事寧忘累世編論文思李白何日聚

湖天

宿瓜渚

暮色隨風雨蒼茫入客舟酒蔬通小市燈火宿瓜
洲水驛更深語江聲枕畔流南徐好山色明日浪
中浮

江樓

京口銀山寺江樓戶牖高風帆投几席杯酒入波
濤海氣迷孤望山光喜並遭金焦在襟帶明日駕
輕舸

出潤州道中作

秋吟閣詩

雨霽清明後，栖霞入夢初。
耽遊判老骨，圖穩耐疲
驢。一路桃花暖，千山落日舒。
同人吟興好，風調竟何如。

別寓樓

十日江頭住，難拋此寓樓。
金焦共風雨，吳楚一咽喉。
樓下即纜解，山窻閉人歸。
屐齒留不堪，回首望烟水自悠。

古春園八首

驅車出北郭，官路少人家。
一徑入林暗，小橋橫水

斜竹高穿澗，筍階艷殿春。
花大有避秦意，桃源莫浪誇。

關地緣廬墓，開軒已坐花。
看來勞布護，溯去損年華。
位置陂陀路，迴旋遠近沙。
佳城隔前浦，鬱、夕陽斜。

屋宇曾無幾，烟霞望已深。
有池皆種藕，無鳥不歸林。
雨過苔痕滑，雲來花影沉。
窈然入境外，那得俗塵侵。

前月江南客，名山遊不窮。
誰知深樹裏，也似萬山

中映竹水俱綠翻階藥更紅一時幽興極顛倒任
哀翁

桂樹密無限小山香幾業不知花放日何以耐秋
風枝壓兒孫老霜侵松竹同值茲新蕊換光潤洒
簾櫳

白雲誰可贈皂蓋忽相過

謂黃默菴使君

轉覺塵氛少應

憐詩思多百年吾老大終日伴巖阿客散吟聲歇
幽懷寄薜蘿

君家好兄弟留客意蕭疎樽倒屠蘇酒池喧潑刺

魚高齋多勝事累日共幽居只恐塵埃逼無由久

駐車

舊作名園賦荒蕪半失真只憑口傳述漫使筆敷
陳韻雜誇新製情多知古春又牽塵累去回首最
傷神

十五夜雨憶昨夜月

莫道天常好陰晴不可知月明將望夜雨掩正圓
時暗殿霑泥徑昏簷響石墀昨宵橋上立烟重已
堪疑

除夕

野曠無舟進河水羨鳥飛歲從今夜改人定隔年
歸村酒勞相餉詩情幸不違兒孫應念我清淚近
爐揮

自到招提後高眠不待昏誰家歡守歲爆竹響孤
村七十驚心過家鄉無信存桃符應未換書字付

山門

冰上牽車者渾如陸地行老夫愁險絕跛足狂心

營

時患右股酸痛

面熟村中老鐘傳空外聲淹遲到明日

回憶隔年情

憶昔永安凍先人阻半途

前庚午先君阻永安度歲

異時詩句

在一樣客心孤和栢樽空有然松火却無僧寮淒
冷地留跡與東湖

瘦石贈布

服稱無如布迎涼有客投可縫非一尺暖老到三
秋錦褐人間辨寒温我輩謀蕭馮亦何德白傅製
棉裘

今秋高雨船汪璞莊集瘦石古春園共賦八

詩囑余續尾

草亭

小築吟詩地，翛然花園中。茆茨三面月，語笑一亭
風。何必須陶瓦，偏宜屬醉翁。秋涼無倚薄，高映太
清空。

槿籬

取徑二三里，逶迤編槿籬。已無花夕落，只有葉秋
萎。不護鄰家犬，空盤日及枝。客來多轉折，出境却
忘疲。

板橋

略約無斯濶，橫溪難疾趨。那求欄可倚，聊借杖相
扶。斷板園門接，平蹊草徑蕪。度來秋瑟瑟，水落亦
堪虞。

栢嶺

秋老不凋栢，盤擎有歲年。土高橫作嶺，幹聳直參
天。向背人工幻，崇卑地勢偏。閒來然落子，亦足傲
枯禪。

柴門

秋吟閣詩

風俗田家厚不妨柴作門敲斜破籬落出入便雞
豚只覺繩樞儉何如蔽席存秋風吹木葉也自閑
黃昏

不苔石

小石一卷耳秋陰生綠苔塊然隨意坐移得襯花
來米袖嫌頑頓垣衣費剪裁山林多土阜撫此幾
徘徊

菰浦

水草都成實雕胡出綠萍沉雲秋米黑伏水晚莖

青鷗冷夢應斷蓮枯粉盡零光一片月相映兩
娉婷

竹徑

愛竹吾家癖名園曳杖時雖無當路筍頗有碍人
枝曲折循苔徑青冥接水湄干霄憑爾去莫學荻
蘆垂

又雪

已喜客歸早何妨雪又飛河水荒市靜酒貴醉人
稀一歲驚垂暮寒城半阻饑老夫擁爐火嗟爾卧

牛衣

展先高祖墓

為展司徒墓荒涼拜起遲未湮五世澤已斷兩朝
碑綸綍傳身後邱原冷海涯松楸不可得惟見黍
離

立春

開年已半月斗柄始回東霧解江梅凍窻迎海日
紅娉婷憐女弱拜起愛孫童此景年々有餘光戀
老翁

秧鼓滿城市逢々走唱春星回尊木德月令紀芒
神客老他鄉慣家貧物態新兒孫一杯酒披豁倍
情親

有使自江縣來求作嫁衣守身終不字垂老竟何
依 聖主巡遊數君門咫尺違看人獻三策道
路沐光輝時有客求代作迎鑾曲

可惜南州彥長辭東海濱卷中珠有耀地下草無
春後世相知少先生結契真遺言命讐校把讀最

傷神

時為徐蘧堂鑿定遺稿授梓

次題瘦石斜陽館

我作竹樓照梧桐漏夕陽看來無實地畫裏置書
床輸爾西窓下迎風伏日涼幾回欲相就長路隔
津梁

酒自何年斲詩從弱歲工只今纔四十佳境到清
空憲啟羲皇北風迎少女東晚來誰造訪竹影正
迷濛

有花兼有竹宜雨亦宜晴歲月歸華館懷安得隱
名時平容我逸土沃及春耕除却吟詩事悠悠世

上情

丙戌元旦

冬日陰寒久剛逢元旦晴湖村餘酒食海宇際昇
平賀節人難辨敲門犬不驚南莊老兄在冰阻不
能行

斗室纔容膝書床於此陳平分安卧榻其半且留
賓襪被遠行物樽壘暫住人問年開八秩幾歷歲

華新貴煇盡耳燕支繁不吹斷語對向高和
鄭存齋席上荷包牡丹分韻

一縷穿無數其中何所儲春風囊括盡國色剪裁
餘富貴誠虛耳燕支染不如倘能貯佳句高咏向
階除

崇川夏含齋囑人致問却寄
或自崇川至殷：若舊歡遠啣故人命為訊近來
安時序當初夏流光似急湍三年狼阜路夢裏仰
巒岼

知己天涯少端人歲久睽薰蕕如共器桃李不成
蹊細雨橋南杖清風研北題華亭孤鶴迴高致亦

難齊

謂一金林

白髮湖干老他鄉歲月深僅能支老骨久已淡名
心纂集藜光暗風騷蠹簡尋竹窓頻掩卷事大恐

難任

時為汪璞莊墓輯東阜詩存

朋友平生重相思意黯然老成凋謝盡

丁麗中程信文兩先

生皆風雨道途偏垂素來何事題詩寄可憐髯公
如念我何惜一蠻牋

和樵所秋夜不寐

偏是悲秋客愁心入夜遙五更常不寐一枕太無

聊露砌蛩敲碎風簾月影搖破除憑短咏意緒也
蕭：味然而外不寐

身是積愁具心思却病難半生餘藥裏舉世味支
蘭懷抱向人盡幽憂到夜闌趾離名神何處去頻

攬薄衾寒

每怪晨興晏應知夜寐慳文心矜似鳳兩目炯如

鰥骨益支離瘦神偏咏歎閒人生重眠食缺一恐

為患

我亦多愁者因君感不平艱難謀口食淫雨害染

盛夢醒傷時事途窮失反生昏只高卧渾似淡
忘情

同年姜南園明府五十二韻

大好清秋節先生介壽筵暑殘炎火退氣爽綵衣

鮮少日猶堪憶中身劇可憐過庭詩禮訓績學鴈

鴻聯角壯隨親任飛騰自翰編近畿官已貴當

宁眷尤堅法立平反允公餘造就先廉使公於署
內廣建書舍

收錄一時能文之士
親課經藝成就甚多諸生多濟公子更翩未

壯科名振專家制義傳會須登顯要豈料竟迤邐

蜀道難如此銅符縮半年官箴原不忝吏議忽相

牽公涖奉節七閱月輾轉巴渝險巴縣延蹉跎歲

月延隻、悲旅櫬兒媳相渺、隔江煙只有詩篇

富常令次舍遷無歸、亦客試問、何天豁達為

佳耳興哀在忽焉逢辰纔五十擊水待三千末路

還當奮寒灰有復然前修憑後勁不用卜筮算

贈陳綠昉十六韻

久羨太邱長門中得二難元方如琬琰光氣耀闡

干素業書千卷清操食一簞氣雄牛可食秀異色

堪餐個儻時賢讓飛騰藝苑寬倘能甘閉戶何患

不登壇談笑紛常解酣嬉夜向闌暫離真欲瘦乍

接已忘寒雅趣耽文藻芳心似蕙蘭竹香茶熟竈

栢翠露盈盤殺兔珍霜穎然松碾墨丸摩挲情自

愜餉遺篋空殘品既超九迹天應假羽翰池中蛟

待舞海上蜃誰觀競爽雲間陸閒居懷縣潘老夫

媿哀謝猶望慶彈冠

贈璞莊十六韻

十載忘形友風流久未泯炎寒都不記僮僕亦相

親彈缺馮煖老分金管氏負豈惟供食指且共歷

車塵棹返湖天臘帆懸江介春筍輿登截業藤杖

拄嶙峋京口頻乘興棲霞支嚮晨攝生無藥草山向

有攝生故名截石鎖 楓宸山多行宮詩紀東山勝文垂

壯極新上有御製詩追陪遊履老遲鈍蹇驢噴一路多

諧謔余不善策蹇屢為瘦石取笑連朝倍主臣逝波鄰海若歸

客拜江神瓜步臨江有江神廟卷帙看君富謳吟逐句珍此

時欣得意壯歲渺何因高惠尋常外哀翁感激真

翠華南下日吳越更通津時有壬午南巡同遊西湖之約

已題管壑白讓宅圖矣復贈此詩

薄俗何堪問披圖感忽深徙家能讓宅遺法自揮

金細檢書須載分攜淚不禁潘輿猶奉板田樹失

成林未改墳篋樂仍懸梨枣心為言新卜築急難

好相尋

竹樓詩鈔

七言律

憶母

興化王國棟著

乙卯秋赴省試歸舟阻風江上抵家而老
母已歿三日矣終天之恨何時云已

團團誤信尋常事忍別慈親獻策時
百里江聲流恨遠三年旅夢到家疑
牛眠地近封偏緩蝸角名虛悟已遲
却憶秋風空作計幾回倚杖問行期

亡妻歿忽百日愴然成詩
廿載飢驅不暫離於今一別杳何之
吾哀未甚神先索女瘦無端故可知
髣髴舊容窓影亂塵埃遺挂壁風吹
自傷眠穩朝慵起不及寒燈夜伴時

燕子磯望江

磯頭燕子飛仍在江上漁人坐未休
滾滾夕陽明遠浪蒼蒼暮色落寒洲
南侵不許秦鞭斲北渡偏深塞馬愁
一片紫雲東海近朝宗猶見古諸侯

陳雨時七十

古稱七十老而傳為慶先生倍惘然
猶子為兒天亦奪童孫久病藥難痊
雄心都付圍碁局笑口惟憑拄杖錢
嗇彼豐茲應不爽助君行樂是長年

寄武昌南雲上人

當初愁別真成別此日思逢那易逢
一里湖山歸舊隱百年霜雪逼哀容
虎溪笑後三聲窸博浪椎還萬事慵
羈旅揚州歲云暮因風書與寄黃龍

寄訓李復堂

海畔清和客思荒故人書到話行藏
百年家學慚

弓冶千里名駒讓驕驕韋杜城南天尺五謝王堂
上燕尋常寸心覩縷言何盡相對頭顱滿雪霜

儀鳳門外漫興

金陵郭外氣氤氳獅子峰陰帶夕曛石露一卷山
有骨波開半面水能文秋風易動蕭蕭鬢老眼全
花齒雲珍重主人相餞意嚴闕將閉手難分

壽家九兄六十

鴈序凋零剩一兄孤辰拜手迴含情飄萍老去髮
俱白策杖人來鄉亦驚詩句自工家事在烟霞多

癖旅兔清明年我擬歸湖上梨棗相推盡此生

吳陵九日西園尋秋

似防落帽科頭出也為登高策杖扶平楚木疎秋
色老隔江山遠客身孤離、菊影連蔬圃短、藩
籬入畫圖尚有石屏荒草護何人重問小西湖

送冒甚原返柴灣

幾回孤館漏沉沉又束輕裘返故林明月清風真
浪跡碧梧疏雨盡愁吟傳家一卷囊中物將母三
牲客裏心我亦四方餬口慣悲歌迭奏有同音

寄白下紫竹林為公和尚

竹林深處是祇林一拂能驅野馬侵
山色入窻高閣迴江聲遠郭暮鐘沉
暫翻貝葉酬都講常吐心花事苦吟
自我別來多歲月香臺飛夢到於今
空山長日淨無塵映室蕭蕭有綠筠
兩序分明初地肅十年辛苦老僧貧
笑傳惠遠人如在船泛曼公跡尚新
湖上近來風物好袈裟此後與誰親

汪璞莊文園二首

絕勝風光莫漫猜仙源依約近蓬萊
山如淡墨千

層染水似接藍一鑑開飛鳥下停窺
洞壑流雲初

合護樓臺主人著意憐今雨幾點庭
除淨碧苔

心期遙映晤偏遲始信雲風自有時
五載相思天

漠丙寅訪君未值閱百年垂暮鬢絲
山林遠辛未正五年矣

近都成畫花鳥幽妍盡入詩湖海由
來踪跡異何

緣常傍習家池

率兒輩之東邨祝九兄七十壽舟中作

細雨侵晨氣尚清攜兒東下有餘情
人生能得幾七十我輩况無多弟兄
豈為年荒歡頓減只愁詩

好和難成茲村舊是團園地且共鄰翁喚麴生

自豐利至白蒲舟中有感兼和諸子雨集海

粟軒見懷

白頭淫滯文園客五載睽違海粟軒似葉扁舟來

海上如鉛清淚洒江村月仍建子寒風肅老記逢

辰舊夢昏今日西州重繫纜縈絲裂管不堪論辛未

中冬子六十賤辰蒲上初公選音作慶今存吾李亭穆堂皆已淪沒

年來音問隔遙岑誰向天涯念友生客路近連衣

帶水故人同抱別離情壚邊貫酒禁風力夜半高

吟入雨聲滿眼琳琅難屬和况緣悼逝思縱橫

明職方鄭公超宗先生影園黃牡丹盛開一

時名下吟賞甚夥主人糊名易書彙送虞山

錢宗伯品定以海南黎遂球為冠因製金卮

刻黃牡丹送之文孫國秉屬書黎詩於冊後

職方為鎮帥所誤郡人疑而支解之作詩一

章志感

先朝郎署有光輝未造勳名心事違桑梓變興身

與碎園林名在影金稀文孫異代清貧老國士當

年逸興飛黃牡丹詩吟未已至今何處覓芳菲
去博上元板橋招竟日
巷分南北復西東少小比鄰類轉蓬漂泊半生無
那老升沉異路豈能同宦歸仍賣文為活困久方
知技未工細雨滿城燈火暗衰顏都仗酒邊紅

四月二日同人過蔭深園

文園西壯碧森、迤邐河干問蔭深竹徑紆迴人
覓路板橋略約客穿林僧攜鉢去空禪榻花送春
歸賸午陰最喜溪山團野色好將歌笑答幽禽

一碧亭望海雲初出

扶桑浴日知何處似有濤聲動地來一唱雄雞天
下白頓看蒼狗海邊開神仙踪跡窺三島雲物光
華徧九垓徒倚山亭凝望久滿身霞采近蓬萊

食麥仁

食新昨歲吟詩句遠恐貧家尚斷炊况是沉災增
米價仍然垂橐在天涯來牟貽我三年夢白首依
人九熟時軟碧滿拌頻勸客又看窗外雨絲、

書姜香嚴憫荒詩後

海縣啼烏尾畢逋江鄉哀鳳澤中呼懷襄半警唐
堯水摹繪重披鄭俠圖若使上聞驚睿慮直
窮民隱到牀膚其中更有難言者多少微辭一歎
吁

新修拱極臺甫竣顧默齋夫子示以同人觴
咏之作感賦

高臺自昔俯西流轉眼繁華作廢邱邑匪名區傳

古蹟郡志載吾邑名蹟只拱極臺暨先王父禮園二處今禮園已廢金頌御府

煥新猷標題畫易前人字登陟休停過客舟本係遊觀

公所當事諭令封閉隔水遙瞻多感慨嘉名誰錫海光樓東

塘博士遊此留題

女墻瓦礫久成堆新整規模亦美哉舊賞地荒猶

可復昔遊人去不重來昔邑中公讌多在此地先君子曾有詩句園亭

隔水無圍畫邑里驚菟半草萊尚喜騷壇今又振

當年原是讀書臺元邑令唐公士龍讀書於此

次和分運張靜遠先生弔吳陋軒先生墓

白楊何處起悲風東海詩人葬海東荒壟歸然無

大鳥後昆存者是哀鴻生原哀颯風流絕客有經

過慨想同勝國遺民當代老高名已擅兩朝中

哭同年姜香巖四首

絕世才華藝苑尊忽傳凶問盡聲吞竟從顏卜休

文去誰砥江河逝水奔拙句漫鐫慚話雨君刻話

及小丙子祝伯母壽堅詩留數日皆置上座杜堂稱慶屢開樽傷心豈

但私情重一代風流莫更論

平生踪跡似參商丁丑之秋最不忘野步隨鷗尋

別墅夜吟同鶴警清霜詩分變體工如鑄人合殊

方醒亦狂一自文園輕判袂竟成永訣付冥茫丑丁

秋同錫山家春明嶺山管蓋白吾邑陸左軒白蒲

年來赤岸擁青氈百里鱗鴻望杳然客到傳書標

閏夏秋清把卷已重泉君閏六月以書托吳興仇

讀君已歿裏言盡化鮫人淚短夢頻驚鴈字天深

恨生芻曾未東西州愁絕水雲邊

為星已慟騎箕客倚杖猶餘樹背人琪樹三株萎

可惜謂令兄也魯齊廷二惠弱難振謂兩令政家

哀落須臾變新鬼煩寃寘漠真賴有象賢擅文譽

相期尤在重天親

南梁雨中述懷

如流歲月客中過，行笈頻移奈老何。
晚食有肝皆是累，孱軀非墨不能磨。
飄零祇賣文為活，身世難拋事正多。
預擬南梁更南去，濛濛絲雨隔關河。

夏日邀顧默齋夫子暨許恒齋陸絨齋徐就

菴趙行坡秋山攜樽集陳佳木柳園同韻

北海池南西郭東，幽光無際似崆峒。
橋平楊柳全拖綠，水溢芙蓉未放紅。
酒榼漫攜長夏日，嘯歌都入遠林風。
最憐座上頭俱白，徒使羈人夢屢通。

同板橋希齋筠谿瘦石集柳村蔭深園

名園三載客重過，行密橋橫路未訛。
幾派清流孤艇入，千章秋樹午陰多。
聽詩使我忘高枕，飽飯看人作壁窠。
看板橋作大字一度逢迎一觴詠，風騷其奈主人何。

哭金山方丈高峰上人

一載相依別十年，十年別路接重泉。
不知面目竟何似，只有音書偶一傳。
衣鉢三更江上寺，菩提無樹米頭禪。
從今細檢傳燈錄，應許遺詩甲乙編。

問字追隨弱冠時，城東蘭若水漣漪。松門未改閒
方丈，竹院仍迎老住持。錫杖不歸終古恨，金山空
峙晚鐘遲。早知虛費鉗錘力，何必天涯問本師。
山水緣慳負白頭，十年方外結綢繆。擬聽鐘磬拋
塵累，長送春秋老寺樓。燈影已從清夜照，時已主
方丈事
三日玉光空向碧山浮。故人曾約扁舟渡，謂張杏
莊明府
而化。籠冷雲寒不忍遊。

幾個攜將隻履歸，箇中消息是耶非。縱然證果西
方去，也與留人北道違。訃至海天秋未老，詩貽鄉

縣淚猶揮，不知此日金山下。曾共吟菟，葵夕暉。

題李琴夫古洞秋琴圖

隔江遙望衆山平，虎豹虬龍近若爭。天下幾人成
大隱，洞中有客奏希聲。七絃未必逢鍾子，千首於
今得李生。似畏終南多捷徑，翻然又動出山情。時將

入都

銀山追憶心潭上人

客船纔泊銀山岸，便訪高僧舊隱居。猿鶴何年隨
杖履，松風長日靜鐘魚。桑門齋供貧常缺，竹院詩

情澹有餘化後千秋憑至友謂李琴夫墓門志傳手親書

昭閔

伍相遺踪何處尋昭閔傳說到於今江流尚鬪投吳路山勢難移報楚心乞食幾曾摧壯志吹簫猶自有哀音功名未就終吞劍留恨錢塘一樣深

金山悼喬峰上人

七祖燈傳耿未昏十年行脚不堪論滄溟龍去虛存鉢方丈人來靜掩門山似含淒殘照冷江如有

恨怒濤奔平生師友忘緇素老淚空沾兩袖痕

渡江

津頭一笑別金焦安穩中流路不遙萬里濤聲歸大壑千層帆影趁春潮山憐鐵甕城邊遠人向江神廟口招最是棲霞遊未厭高峰西望尚岩堯

食蓮

菡萏搖風十里長亭蓮子綻青房金莖夜裏新秋露玉椀朝分早稼香心苦也應徵食指味殊何異酌天漿頻年海上空相憶別有清芬未易嘗

寄許衡州

兩湖秋水晚烟虛重訪伊人舊隱居詩畫別裁真
大雅琴書以外一空廬塵中未免聰明累前囑子書聰明

累人老去寧教故舊疎十日居停費供給又分弱

女季錢餘君子然一身祇餘弱女家貧甚按季以筆墨賞相助

吳漁友已到揚州久遲不至

客意蕭騷老自嗔那堪客舍更懷人百年歲月愁
中過千里朋交夢裏親何日家山違白岳經時邗
水蕩紅塵歸航早晚催霜雪只恐相思也損神

過劉師舖有懷姜六南園

風流雲散劉師舖斷鴈寒鴉古戍墩萬里飛騰名
自重一經羽翼道原尊金蘭譜舊懷吾友薑芥園
荒類此村若是鳩茲甘苜蓿不教淫滯老荆門

冰阻東場

海上空迴訪戴船輕裘雪後意蕭然客行楊子臨
岐路寒比南州語鶴年東道無聊留晚食朔風加
厲警宵眠幸依弱女歡相對情暖難融水腹堅

壬午立春日雨

東風習習雨冥冥，春氣纔舒冷畫屏。不見卿雲書
太史，却看梅萼動閒庭。兒孫歡補元朝慶，朋好來
稀外戶局六十餘年。孤子淚白頭承祭，幾行零日
先君忌辰

壬午二月詩

天恩汪濊古今無，御極頻年拜賜租。纔發
鑿輿關，睿慮又捐逋賦。及荒湖歌傳夏諺，窮簷
喜澤遍春郊。布穀呼况復隨車有甘雨，大書青簡
待南狐。

聖祖南巡慶惠深，我皇繩武亦頻臨。衣冠拜舞餘

孫子海宇昇平邁，古今文盛正同周。四代風薰不
異舜，鳴琴臣民漫欲誇。前制粧點揚州似，上林
廣陵城外繡成堆。法海平山生面開，岡阜忽移為
大壑。舟車所至盡春臺，風搖護蹕堤邊柳。雪綻
承恩嶺上梅，草木有情供點綴。高陵都是土新
培。

山水生成各一方，大江南北總來王。梅花蔽日思
元墓，芳草回春慶蜀岡。流峙眼前人力盡，烟花時

下物情狂
乘輿信宿移
仙仗野老傳聞頌
聖皇

浮玉峰高春水深
五雲靉靄護祇林
塔摩銀漢旌
旗繞寺接金鋪
卉木森遲日餘紅
留燕語澄江一
碧抱龍吟吳山越
嶠天王地忍負蒸
黎望幸心

靈隱蹈光畫不能
幽妍那用俗塵增
龍翔鳳舞
天才健水秀山明
地脉凝聖世豫遊
周海甸迴車旌旆
指金陵省方御製
高難和草莽儒生

興屢乘

翠微雲護翠華臨
萬戶千門到處深
泉石有情增氣象
花林應候摠陰森
松盤九老龍鱗露
佛鏤千岩象教欽
昨歲騎驢探幽勝
至尊留咏在嶽

天童神靈久右文
乘時獻賦盡卿雲
一經召試

趨丹陛便許登天
數白粉敢謂不隨
驢馬喙只緣甘入
鷺鷥羣白頭知與
青雲隔仍向芸窓
老策

勳

秋吟閣詩

三月望宿茨山明府西園晚同北山木山暨
兒雛山亭坐梅

江村近在板橋西老客重來問舊栖去年冬寓此芳樹

未全飛絳雪崇岡仍許上丹梯風過竹裏山亭冷

香動林端海月低莫訝春光今歲晚好留烟景待

招攜

閱南園字江集書後

益州山水壯荆門萬里蠶叢虎豹屯宦海風波多
退鷁文心哀怨雜啼猿半年易醒淳于夢五載空

尋杜老村贏得淵源通一脉把吟愁絕夜燈昏

顧冠雲送天水蕪惠茶菊橄欖

一勺天泉慰渴思何須佳物復相隨秋英益壽哀
翁喜諫果回甘逆旅宜活火乍烹猶恨晚新茶未
到不妨遲豈惟舌本餘清味直沁心脾挹素蘂

吳明良見招即題其齋

小橋南去路還迂說是當年隱者居高樹日長惟

聽鳥深池網集好觀魚閣無舊跡秋仍在昔有秋在閣

客有新盟夏正初若問尋常何所事龍跳虎卧右

軍書

君樵古
榻甚多

次答江八葯船見懷

一別動教經歲月白頭那得不相思高齋詩酒樂
易過我輩性情人豈知身老自憐謀食急地偏常
恨寄書遲蒲塘雉水無多路只恐龍鍾匪舊姿
哲兄昨日書纔達清淚行間話所思孤潔恥干當
世譽窮愁惟有故人知生成傲骨終何損著就名
山尚未遲為和君詩翻一笑樊籠海鶴本仙姿

所全
札兄
樵

時接

夜長次和瘦石

夜長竟與客愁同處暑纔交七月中蟾影已沉千
樹雨蛩聲欲倦五更風哀翁歲晚衰難白小婦粧
殘病不紅伏枕遲明諸慮集晨鐘猶未報瞳矐

寄原監司張靜遠先生

鑿江、上舊監司三月居憂政遂移敢置生芻無
姓字漫隨野鶴肅丰儀風波豈料興平地愚弄原
來是小兒覆雨翻雲幾不測雖聞未減至今疑
孤臣萬里荷天恩赤日垂光照覆盆自是冰心

昭坦白竟違吏議得平及鵬飛六月南溟息系出
三韓北塞屯 聖世關門頻籲俊肯容稷契久田

園

明公好士爭趨廷尉門前未盡無縱有故人懷

舊德誰攜短劍慰長途南陽彊直朱文季深室周

旋甯大夫

吳門朱文也孝廉授張公子書公被逮朱周旋其間入都繾綣從之不去我

亦當年門下客白頭袖手只長吁

官齋迎養久難留日下於今侍太邱樽酒歡承孤

月夜屐屨重訪故園秋詩經輶軻多新調家暫栖

遲念昔遊膝下雙珠搃英異授書曾伴海西頭

花朝顧默齋夫子招同許恒齋徐就菴朱聲

遠陸緘齋趙竹坡秋山賞玉蘭同用蘭字

老梅昨夜飄紅雨令節邀人賞玉蘭酒畔香遲風
力軟花朝座近雪光寒繁枝似客頭俱白高會飛
觴量忽寬木筆南榮猶未放詩成好借寫琅玕

登狼山

狼峰巖藁據江濱一杖相扶入鳥羣烟重遠天虛
望海風高方塔果支雲 塔名 逶迤遙望劉郎路碑

銘疑傳駱子墳劉名芳見斷碑偏傍傳為賓王墓 楚客無名留石
上空將吟嘯付斜曛

至日再用杜句起懷杏莊張司馬東淘公

年々至日長為客官閣聯吟彼一時別後大都高

興少愁多惟有使君知虹橋畫舫三春夢三月揚州一聚

狼阜僧房半子詩預擬東淘是歸路兩心溫暖話

相思

送江蘭野赴安慶張叅戎幕

將束輕裘溯上游一肩吟上木蘭舟書生握管從

戎事主將掄才是狀頭張武王儉府中蓮艷治嚴

公幕下酒淹留白衣僧父哀頹甚那得安危獻一

籌

五月一日自白蒲至豐利舟中作呈璞莊

春來短札幾回封相訂過從五月中百里近分蒲

水路一船涼動棟花風頻移行李嗔童子久歷津

程認老翁誰識主人情最洽到門姓字不須通

八月歸舟

三月離鄉八月歸春風芳草秋風腓眼看歲序速

如此身困舟車老可譏筆塚墨池行笈裏風晨雨
夕在家稀兒孫莫誤圖長聚恐逐賓鴻又遠飛
顧木山贈佳穎刻魚山書筆字慨然有懷魚
山木山兄也久客京邸

諸昆自昔幾追攀阿季年時日往還正是霜天排
鴈字却拈斑管見魚山雲深薊北音書杳日落江
南會晤艱珍重樓頭拜君惠西風迢遞惱衰顏

柳園招集賦暮烟

夕陽靄々下虞淵花氣迷離護晚筵對岸樓臺如

畫影近堤檣櫓辨歸船風薰酒面窓都啓雲起池
心水欲連燈火乍明人盡散迷濛深護鷺鷥眠

立夏前一日范貫一邀同趙稱山解際寧官
汾陽謝度遠東墅看牡丹

東墅幽偏近海濱花開邀客畫船新全憑國色天
香種一洗黃茆白葦塵名勝難逢都倚醉風光漸
轉尚餘春最憐人散誰為主留得高空月一輪

寄汪意園使君

江上文星與酒星海天靈雨歲常零官閒斗室虛

窻白竈遠金堤夜火青疾苦細詢吟上石詩有觀海
芙蓉將綻結成亭秋梅秋老夫負約遲相就不見
花時醉作銘

除夕

何緣避世入深村歲暮嚴寒火不溫無與為歡翻
失笑有誰解事只閉門老兄高卧詩壇隔弱女孤
幃淚眼昏晚藝松盆拈栢酒強抒鬱抱對兒孫
瘦石校訂范思堂詩畢得詩一首索同館和
故人遺草得重披身後千秋定在茲風韻儼存真

面目含咀須會苦心思難忘一榻圍花日最是三

更擁客時

丁丑秋蒙留榻菊花深處

臨別三更同人送余出城檢誦秋懷無

限淚淙、檐溜與同垂

若秋懷詩寒花消息憑誰問短榻橫窻夜月虛

哭璞莊四首

廿載天涯共夕晨漫將膠漆比雷陳分甘繼、馮

唐老損惠年、管氏貧豈料龍蛇驚夢幻竟同鷹

隼出風塵眼前景色居然變暑雨炎風最愴神

雨雪長途冷孟陬為君五十祝添壽青陽送過歸

黃壤彩筆吟殘哭白頭

四月上旬花前豪興至五月而長往矣

頽影

似知餘日迫捐賓不與故人謀文園此際誰相問

剩有詩壇一段愁纂刻東臯詩存謀之多年今甫開雕而君逝矣傷哉

舊好猶存觸境悲園亭無主益淒其客來相向惟

揮淚死去重逢是幾時日者慣言休咎事星相兩家皆言

五十天乎不界緩和醫莫題身外紛如蜩慘見頽

親與穉兒

世事差池詎可料愁吟一卷計開雕人亡我免災

梨棗例合君當續漢韶時謀梓拙集校已具而君歿所刻詩存生者不錄君

詩將附卷未矣萬里飛騰忙裏誤千秋名氏卷中標只憐

雷火流光速老淚滂々太不聊

因盧飛泉寄家蘋浦

客從京洛返江城為道吾宗念老儻風雅更徵先

子集孱羸偏繫遠人情青衫黥黥迷南國綵筆琳

瑯重北平君有北平才子之譽邇日玉川馨齒頰白頭翹望

思縱橫

從來華胄擁犀軒日下潛居道自尊况是清才

卑屈宋却耽高卧讓鵬鯤消磨歲月圖書府寂寞

旌旄烏雀門我老更憐姜白石一經林下手重繙

秋吟閣詩

君因姜南
園知賤名

竹樓詩鈔

絕句

興化王國棟著

採蓮曲

妾住在橫塘郎居隔前浦
食蓮莫食心惟有蓮心

苦

郎欲別我去含悽奈何許
食蓮莫去心與郎同甘

苦

次蓉鏡採蓮曲韻

秋吟閣詩

只見蓮作花不見蓮作實蓮心與妾心甘苦郎未識

長采蓮莫傷藕白大如航並載歡與儂絲牽似箇

清明

積雨空園冷桃花何日晴忽然聞野哭人說是清

明

新月

新月如避人清光倏已匿不復見西山微映東

壁

孤兒

四歲藐孤兒舉止異羣輩一跪三叩首居然學父拜

讀史

內史常存狗馬心拾遺補過力能任如何十載淮陽老不及平津寵眷深

鈎弋宮中堯母門婕妤生子荷殊恩誰知趙虜陰謀起湖上空臺有淚痕

大樹將軍得衆心
恩波耿鄧與俱深
蕪萁豆粥滹
沱飯厚意難忘
直到今

漢業中興策力多
雲臺圖就鬱嵯峨
椒房何與功
臣事不許丹青畫
伏波

漢廷言利及車船
鹽鐵紛々盡海壖
縱祈秋毫猶
拙計不如西邸賣
官錢

龍虎雲風知遇深
武侯出處更堪欽
不緣三顧勤
先主正好隆中抱
膝吟

魏武奸雄不世才
誰思晚節劇堪哀
只今銅雀臺

邊月曾照分香賣履來

歎息江東歷數遷
零陵尺土幾時延
廢王不及陶
徵士留得先朝晉
字傳

五馬南奔五代驅
神州腥穢莫能除
開皇淨掃無
中外舊姓猶傳普
六茹

昨夜平安火不來
潼關失守起徘徊
延秋門上烏
頭白啼送楊妃
葬馬嵬

齋中雜咏

歲月摧歲白髮翁
閉門塵事不匆匆
怪他草木爭

顏色伏日驚看雪裏紅
盆蘭二種愛蕭疎花過新芽出土初
晝避陽驕宵
浥露最宜長葉曉風梳
老樹渾如襍穢翁不花不實倚前櫳
却饒密葉沉
沉綠剛蔭幽人一畝宮
編行為籬曲徑長覆籬花葉日無光
靈根却似東
鄰女三載窺臣上短墻

夜涼

白露浮天夜漸長
寒衣未授老先涼
自從失却鳴

雞婦怕聽花間絡緯娘

五哀詩

五君子者皆先子故交予小子及見丰儀
者也今皆淪沒不勝風流雲散之感云

閔明經

識集

諱長虹字在東辨曠齋先子晚年交也先子歿時蒙餽遺入郡縣叨

鄭驛當時厚意長門風王謝擅餘芳
只今有子貧
於我短褐相看兩鬢霜

黃趙州

諱又字燕思質先子詩板而焚券者也能詩老授一官未幾卒於官

軀健監門老姓侯鬢鬚霜雪古風流桂陽萬里摩
天嶺誰與招魂說趙州

黃建陽

諱吉暹字仲賓號平菴先子門下士也往來近二十年今貧老而歿

林立詩家江介珍亂風掃葉劇傷神一從此老歸
泉後風雨揚州少主人

朱文學

諱國祚字召公子仲兄婦翁也歎歲攜家入郡居負郭水次讀書自娛予戊子初應郡試拜公每招遊指示古蹟

初到揚州覓所親抱門綠水似龍津只今茅屋看

猶在無復冥搜古蹟人

浮村上人

公清修內裕而所居不奉佛像喜交遊一時名公卿咸引重焉

師是瞿曇異代孫香花供養酒盈樽天童歸後猶

相見名占揚州古杏園

先君有送浮村上人遊天童詩

題薛斂齋夫子所藏李越石先生暨先大人

墨蹟冊子

先君墨蹟無歲本不及將軍七世僧深仗先生寶
球璧肯隨繭紙入昭陵

素愛張顛草聖傳遇天落墨有餘顛風流似舅思

秋吟閣詩

先子野鷺家雞兩泣然

金沙竹枝詞

青。麥隴分千步短。茶童得一猴借問文人幾
兒子為言膝下兩了頭

三姓圍環小市廛家。耕織太平年日晞曉露郎
芟麥風閃宵燈婦紡棉

繡分江海膏腴壤星散茹茨淳樸家怪底門前鋪
白雪都乘新霽晒棉花

傳家生活一官籤新奉醮司禁約嚴閒殺了男行

不得忍教童叟去挑鹽

望劉氏蔭深園

客中無日不長吟徙倚河亭送遠音十頃濃陰青
未了一回烟雨一回深

題畫蘭

東風料峭雨絲斜瑟瑟縮梅枝與柳芽莫說海濱春
不到街頭昨日賣蘭花

題牧羊圖

萬里冰天漢節懸李陵降後費周旋贈行留別詩

都好鬻雪輸他十九年

春陰

老年一倍愛春華
客裏心情勝在家
怪底東風多錯迕
只催寒雨不催花

除夕

貧家樽酒故人遺
杯酌能勝婦與兒
萬事拋荒惟酩酊
却教除夕併無詩

平山竹枝詞四首

三月烟花自昔傳
新來一倍引遊船
穿山過檻無

涯水却有源頭迸石泉

遠望瀰漫一鑑開
嵌空架險搆樓臺
但誇香海慈雲好
多少金錢辦得來

向來水窄今多水
看去山高是假山
不問人工與天巧
可能南狩霽龍顏

桃花人面兩相當
約伴同登選佛場
行到栖霞忽惆悵
新懸告示禁燒香

題畫

爐火通紅撥懶殘
千秋佳話在衡山
十年作相非

吾事只管無言啖芋還
櫻桃諸蔗搃登盤
枇杷如今見一斑
饒口莫嫌多
着子不曾親摘洞庭山
最愛秋蔬一架霜
纍纍豆角摘琳琅
更憐夜卧龍鬚簟
好聽柴籠絡緯娘
炎方荔子熟堪拈
嶺表何曾負子瞻
人食五枚練家紫
中邊直得到今甜
園蔬端的晚菘佳
青女纔勻佐食鮭
寄語山僧莫全占
菜根咬定是吾儕

一
言張翥奉使歸石榴嘉種至今遺
竟同萬里戎王子不記何年別
月支

蓮綻菱紅出水鮮
吾鄉土物半秋田
只愁未秩西成事
充稼憑渠亦可憐

若是綏山得一桃
未能仙去也堪豪
愛他略着臉脂染
饒口流涎笑老饕

及時佳品美堪茹
櫻筍江南朱夏初
留與僧房嫌淡泊
不如乞去聲我煮鱖魚

蘆菘由來種類殊
一甘一辣共成園
不知當日劉

孟子掘向庭中辨得無

一寸黃柑猶是青杜句杜一枝佛手指空靈不知微笑

拈花後散向諸天幾處馨

芒種已過梅子熟秋風初動栗皴開松間小菌時

時有肴果登盤倩孰陪

百花洲 宗子相讀書處

名高七子擅風流一哭忠魂淚未收楊忠愍遇害公哭之解衣

覆其節義文章都不朽綠楊猶護百花洲

南亭 先少叅公墓

豐碑卧草字縱橫風雨年々寒酒牲慚愧飄零老
孫子墓門荒落走鼯鼯

陵亭

滄浪南去是陵亭汴將橫戈戰血腥今日守風近
村舍漁舟搖過酒旗青

永安

樊川十里永安船春水相連帶野煙柏酒椒花薦

元日詩情悽惋是何年前庚午先君阻水於此度歲

題畫蘭贈章希齋索琵琶圖

客舍晨興一事無墨池激灩撫霜鬢寫將一片瀟
湘影博得潯陽江上圖

舟中口占

迢々百里木蘭船三月風光晚更妍一片茱萸榆
莢綠投藍水映蔚藍天

詩豈易言哉有學人之詩有詩人之詩學人之詩
博貫典實審據根柢詩人之詩用意含蓄中若無
物余謂學人之詩不善而失於綿邈詩人之詩不
學則病其空疎曩見朱竹垞太史非嚴滄浪之論
蓋已先獲我心矣老友竹樓先生考証源流窮極
經史其詩則胚胎三唐直造李杜之域能世其尊
甫西齋先生家學者也與余訂交有年館之舍下
朝賡夕唱因得讀其秋吟閣詩五卷絃外之音一
唱三嘆惜近歲所作甚夥顧皆未入集中宜增梓

其續集先生欲余一言余之謏劣烏足以重先生
書此以為續刻之勸余得附名卷末豈不幸歟
乾隆甲午秋七月鶴亭江春拜跋於康山草堂



